

摘藻堂四庫全書薈要

史部

欽定四庫全書叢要

史部

直齋書錄解題卷五



詳校官員外郎臣潘紹觀

欽定四庫全書薈要卷九千七百十一

史部

直齋書錄解題卷五

宋 陳振孫 撰

詔令類

西漢詔令十二卷

是郡林處德祖編采括志傳參之本紀以示信安程

俱致道俱以世次先後各為一卷差比歲月纂而成  
書且為之序處嘗試中詞學為開封府掾尹以佞幸  
進有所不樂引疾納祿去遂終於家

東漢詔令十一卷

宗正寺主簿鄧樓昉編大抵用林氏舊體自為之序帝王之制具在百篇後世不可及矣兩漢猶為近古愚未冠時無書可觀雖二史亦從人借嘗於班書志傳錄出諸詔與紀中相附以便覽閱既仕於越乃得見林氏書而樓氏書近出其為好古博雅斯以勤矣惟平獻二朝莽操用事如錫莽及廢伏后之類皆當削去莽時尤多也

本朝大詔令二百四十卷

寶謨閣直學士

案原本誤作寶錄閣  
今據文獻通攷改正

豫章李大異伯

珍刻於建寧云紹興間宋宣獻家子孫所編纂也而  
不著其名始自國初迄於宣政分門別類凡目至為  
詳也

玉堂制草十卷

參政鉅野李邴漢老編承平以前制誥

中興玉堂制草六十四卷

同知樞密鄱陽洪遵景嚴編起建炎迄紹興末

中興續玉堂制草三十卷

丞相益文忠公東里周必大子充為學士院時編進  
始嘗進言加上德壽尊號不以表而以議且稱嗣皇  
帝為非是遂草之今書以尊號表為卷首而增附館  
職策問於後起隆興迄淳熙改元自後未有續者

綸言集三十一卷

宇文粹中虛中兄弟所編集

中興綸言集二十八卷

左司郎中莆田鄭寅子敬編寅知樞密院僑之子靖重博洽藏書數萬卷於本朝典故尤熟

偽史類

淝上英雄小錄二卷

信都鎬撰

案鄭樵通志作偽吳信都鎬撰

所錄楊行密將吏有勲名

者四十人其二十四人皆淝上餘諸道人又有僧道漁樵之屬十人錄其小事故名小錄

江淮異人錄二卷

吳淑撰所紀道流俠客術士之類凡二十五人

南唐烈祖開基誌十卷

南唐滁州刺史王顏撰起天祐乙丑止昇元癸卯合

三十九年

南唐烈祖實錄十三卷

南唐史館修撰高遠撰闕第八第十二卷遠又嘗為  
吳錄二十卷而徐鉉鄭文寶皆云開寶中遠始緝昇



元以來事書未成而疾悉焚其草故事多遺落

江南錄十卷

給事中廣陵徐鉉鼎臣光祿卿池陽湯悅德川撰二人皆唐舊臣故太宗命之撰次悅即殷崇義避宣祖諱及太宗舊名并姓改焉

南唐近事二卷

工部郎江南鄭文寶撰序云三世四十年起天福己

酉終開寶乙亥

案宋太祖在位十七年首庚申盡丙子乙亥乃開寶八年原本作己亥誤

今改正

然泛記雜事實小說傳記之類耳

江表志三卷

鄭文寶撰序言徐鉉湯悅所錄事多遺落無年可編  
然前錄固為簡畧而猶以年月紀事今此書亦止雜  
記如事實之類爾近事稱太平興國二年丁丑今稱  
庚戌者大中祥符三年也

南唐書三十卷

陽羨馬令撰序言其祖太博元康世家金陵多知南

唐故事未及撰次今纂先志而成之實崇寧乙酉其書略備紀傳體而亦言徐鉉湯悅之疎畧云

江南餘載二卷

不著姓名序言徐鉉始奉詔為江南錄其後王舉路振陳彭年楊億皆有書大概六家皆不足以史稱而龍衮為尤甚熙寧八年得鄭君所述於楚州其事迹有六家所遺或小異者刪落是正取百九十五段以類相從鄭君者莫知何人豈即文寶也耶

新修南唐書十五卷

寶謨閣待制山陰陸游務觀撰采獲諸書頗有史漢  
前蜀紀事二卷

後蜀學士毛文錫平珪撰起廣明庚子盡天福甲子  
凡二十五年文錫唐太僕卿龜範之子十四登進士  
第入蜀仕建至判樞密院隨衍入洛而卒

後蜀紀事二卷

直史館太常博士董淳撰惟記孟昶事

蜀檮杌十卷

殿中侍御史裏行新建張唐英次功撰唐英自號黃松子商英天覺之兄也

吳越備史九卷

吳越掌書記范垌巡官林禹撰按中興書目其初十二卷盡開寶三年後又增三卷至雍熙四年今書止石晉開運比初本尚闕三卷

吳越備史遺事五卷

全州觀察使錢儼撰倅之弟也其序言備史亦其所作託名林范而遺名墜迹殊聞異見闕漏未盡者復為是編時皇宋平南海之二年吳興西齋序蓋開寶五年也儼以三年代其兄僊刺湖州

閩中實錄十卷

周顯德中揚州永貞縣令蔣文暉記王審知父子及將吏儒士僧道事迹末亦畧及山川土物

閩王列傳一卷

秘書監晉江陳致雍撰二世七主通六十年

閩王事迹一卷

不知何人作卷末稱光啓二年至天聖九年一百三

十八年其所記頗詳

案閩亡於五代之末其世紀不得至天聖九年疑有誤

三楚新錄三卷

知貴州修仁縣周羽沖撰上卷為湖南馬殷中卷為

武陵周行逢下卷為荆南高季興

湖南故事十卷

不知作者記馬氏至周行逢事館閣書目作十三卷  
蓋為列傳十三篇其實十卷也文辭鄙甚

五國故事二卷

不知作者記吳蜀閩漢諸國事

九國志五十一卷

右正言知制誥祁陽路振子發撰九國者謂吳唐二  
蜀東南二漢閩楚吳越各為世家列傳凡四十九卷  
末二卷為北楚書高季興事張唐英所補撰也



十國紀年四十卷

劉恕撰十國者即前九國之外益以荆南張唐英所謂北楚也

天下大定錄一卷

殿中丞通判桂州王舉撰景祐間人始高季興終劉繼元其所記疎畧獨江南稍詳書本十卷今但為一卷恐非全書也

陰山雜錄十六卷

不著名氏莆田鄭氏書目云趙志忠撰志忠者遼中  
書舍人得罪於宗真挺身來歸歐公歸田錄云志忠  
本華人自幼陷虜為人明敏在虜中舉進士至顯官  
歸國能述虜中君臣世次山川風物甚詳今觀此書  
可概見矣

燕北雜錄五卷西征寨地圖附

思卿武珪記嘉祐六年宮苑使知雄州趙

案此處原本闕一字

進於朝珪自契丹逃歸事見國史傳

契丹錄一卷

即陰山雜錄之首卷也

匈奴須知一卷

歸明人田緯編次錄契丹地理官制

辨鳩錄一卷

不著名氏契丹譯語也凡八篇

虜廷須知一卷

左藏庫副使知安肅軍陳昉撰熙寧元年集賢校理

鄭穆為之序凡二十一條目

崇文獻通攷作胡穆為之序

西夏須知一卷

內殿承制郎延都監劉溫潤撰凡十五條目

金人亡遼錄二卷

燕山史愿撰或稱遼國遺事

松漠記聞二卷

徽猷閣直學士鄱陽洪皓光弼撰皓奉使留敵中錄

所聞雜事

征蒙記一卷

金人明威將軍登州刺史李大諒撰建炎鉅寇之子  
隨其父成降金者也所記家人跳梁自其金威時已  
不能制矣

金國志二卷

承奉郎張棣撰淳熙中歸明人記金國事頗詳

金國志一卷

不著名氏似節畧張棣書其末又雜錄金國事宜及

海陵以後事

金國節要三卷

右從事郎充人張匯東卿撰宣和中隨父官保州陷  
金十五年至紹興十年歸朝

偽楚錄二卷

不著名氏

偽齊錄二卷

不著名氏

金人南遷錄一卷

稱偽著作郎張師顏撰項初見此書疑非北人語其間有曉然傳會者或曰華岳所為也近扣之汴人張總管翼則云歲月皆牴牾不合益證其妄

雜史類

越絕書十六卷

無撰人名氏相傳以為子貢者非也其書雜記吳越事下及秦漢直至建武二十八年蓋戰國後人所為

而漢人又附益之耳越絕之義曰聖人發一隅辯士  
宣其辭聖人越於彼辯士絕於此故題曰越絕雖則  
云然而終未可曉也

越者國之氏也絕者絕也謂勾踐時也絕者絕也絕  
惡反之於善越專其功故曰越絕並見本書 文簡  
批編尾云越絕書謔不可讀如樂架之有啞鐘漁父

辭劍事見於此書

隨齋  
批注

戰國策三十卷



司馬遷史記所本劉向所校者也但無撰人名氏後漢高誘注自東周至中山十二國凡三十三篇

鮑氏校定戰國策十卷

尚書郎括蒼鮑彪注以西周正統所在易為卷首其注凡四易藁乃定

九州春秋九卷

晉司馬彪紹統撰漢末州部之亂司冀徐充青荆揚梁幽凡盜賊僭叛皆紀之

華陽國志二十卷

案唐書藝文志華陽國志作十三卷

晉散騎常侍蜀郡常璩道將撰志巴蜀地理風俗人物及公孫述劉焉劉璋先後主以及李特等事迹末

卷為序志云肇自開闢終乎永和三年

原註劉璋乃焉之子

後魏國典三十卷

唐太常少卿元行沖撰行沖以系出拓跋乃撰魏典三十篇文約事詳學者尚之此本從莆田劉氏借錄卷帙多寡不同歲月首尾不具殆類鈔節似非全書

大業雜記十卷

唐著作郎杜寶撰紀煬帝一代事序言貞觀修史未盡實錄故為此書以彌縫闕漏

建康實錄二十卷

唐許嵩撰載吳晉宋齊梁陳六朝都建康者編年附傳大畧用實錄體

行在河洛記十卷

唐宰相尉氏劉仁軌正則撰記李密王世充事末二

卷記隋都城宮殿池苑按唐志作行年記二十卷

河洛春秋二卷

唐洋州司功包諝撰記安史之亂

明皇雜錄一卷

唐校書郎鄭處誨撰雜記明皇時事大中九年序處誨太和八年進士也

開天傳信記一卷

唐吏部員外郎鄭棨撰雜記開元天寶時事

安祿山事迹三卷

唐華陰尉姚汝龍撰

案唐書藝文志作姚汝能

開元昇平源一卷

唐史官吳兢撰叙姚崇十事

廬陵王傳一卷

唐彭王傅會稽徐浩季海撰叙狄仁傑五王事

奉天錄四卷

唐趙元一撰起建中四年涇原叛命終興元元年克

復神都

燕南記三卷

唐恒州司戶魏郡谷況撰專記成德一鎮事自建中

二年至太和七年起張孝忠

案唐書建中二年九月李納陷宋州李惟岳將

張孝忠以易定二州降原本作張志忠誤今改正

終王承元古語有燕南垂

趙北際今以其在燕之南故名然河北諸鎮連叛事

迹大畧具矣

建中河朔記六卷

唐李公佐撰序言與從弟正封讀國史至建中貞元之際序述河朔故事未甚詳備以舊聞於老僧智融及谷況燕南記所說畧同參錯會要以補史闕

邠志三卷

案唐書藝文志作二卷

唐殿中侍御史凌準宗一撰邠軍即朔方軍也此本從盱江晁氏借錄其末題曰文忠修唐史求此書不獲今得於忠憲范公之孫伯高其中尚多誤當訪求正之紹興乙丑晁公鄮

涼國公平蔡錄一卷

唐山南東道掌書記鄭澥蘊士撰涼國公者李愬也  
國史補三卷

唐學士李肇撰

大唐新語十三卷

唐江都縣主簿劉肅撰自武德迄大歷分類編纂凡  
三十類元和丁亥歲序

太和野史三卷



不著名氏但稱大中戊辰陳郡袁濤序自鄭注而下  
十七人本共為一軸濤分之為三卷

太和權克記一卷

文與上同而不分卷豈其初本耶

野史甘露記二卷

不著名氏上卷記甘露之禍下卷叙諸臣本末

乙卯記一卷

唐布衣李潛用撰末又有吳郡李寔者述訓注本謀

附益之乙卯者太和九年也

兩朝獻替記三卷

唐宰相李德裕文饒撰叙文武兩朝相位奏對事迹  
會昌伐叛記一卷

李德裕撰記平澤潞事

次柳氏舊聞一卷

李德裕撰記柳芳所聞於高力士者凡十七條上元  
中芳謫黔中力士徙巫州芳從力士問禁中事德裕

父吉甫從芳子冕聞之

四夷朝貢錄十卷

唐給事中渤海高少逸撰會昌中宰相李德裕以黠  
夏斯朝貢莫知其國本原詔為此書凡二百一十國  
本二十卷合之為十卷

東觀奏記三卷

唐右補闕裴廷裕

案文獻通攷  
作裴廷裕

膺餘撰記宣宗朝事

凡八十九條

貞陵遺事二卷續一卷

唐中書舍人令狐澄撰吏部侍郎柳玘續之澄所記  
十七事玘所續十四事

咸通庚寅解圍錄一卷

唐成都少尹張雲景之撰言南詔圍城扞禦事

金鑾密記三卷

唐翰林學士承旨京兆韓偓致堯撰具述在翰苑時  
事危疑艱險甚矣昭宗屢欲相之卒不果而貶竟終

於閩非不幸也不然與崔垂休輩駢肩就戮於朱溫之手矣

廣陵妖亂志三卷

唐晉陽鄭延誨撰

案唐書藝文志作郭廷誨撰

言高駢呂用之畢

師鐸等事

汴水滔天錄一卷

唐左拾遺王振撰言朱溫篡逆事

朱梁興創遺編二十卷

梁宰相馮翊敬翔子振撰自廣明巢賊之亂朱溫事迹迄於天祐弑逆大書特書不以為愧也其辭亦鄙俚

莊宗名禍記一卷

後唐中書舍人黃彬撰

三朝見聞錄八卷

不知作者起乾符戊戌至天祐末年及莊宗中興後唐河東事跡三朝者僖昭懿也其文直述多鄙俚

大唐補記三卷

南唐程匡柔撰

案馬令南唐書作程匡柔原本作臣柔誤今改正

序言懿宗

朝有焦璐者撰年代紀述神堯止宣宗匡柔襲三百  
年歷補足十九朝起咸通戊子止癸巳附璐書中乾  
符以後備存補紀未有後論一篇文辭雖拙論議亦  
正

賈氏備史六卷

漢諫議大夫賈緯撰叙石晉禍亂每一事為一詩系

之

晉太康平吳記二卷

周兵部尚書張昭撰世宗將討江南昭采晉武平孫皓事迹為書上之

晉朝陷蕃記四卷

宰相大名范質文素撰據莆田鄭氏書目云爾本傳不載故館閣書目云不知作者未悉鄭氏何所據也  
五代補錄五卷



尋陽陶岳撰每代為一卷凡一百七條岳雍熙二年進士

五代史闕文一卷

翰林學士鉅野王禹偁元之撰

建隆遺事一卷

王禹偁撰其記陳橋驛前戒誓諸將事元出熙陵而序文云近取實錄入禁中親自筆削然則此書之作誠有謂也邵氏聞見錄亦嘗表而出之而或者亦辨

此書之偽是見於王明清揮塵錄者尤有據當考

原註

又名篋中記 案揮塵錄建隆遺事世稱王元之所述其間率多誣謗之詞如稱趙普盧多遜受遺詔昌陵尤為舛謬韓王以開寶六年八月免相至太平興國六年九月始再秉衡鈞當太祖升遐時普政在外何緣前一日與盧丞相同見於寢又稱太祖長子德昭為南陽王初未嘗有此事且載秦王傳中云云安有淳化三年而見三朝國史耶李燾亦識此書鄙陋不類禹偁平日之文則此書之非禹偁作益足信也

### 甘陵伐叛記一卷

題文升撰不知何人末有論稱甘陵人蘇朔為余言

其大父慶歷中陷賊親見則初叛時事

原註則蓋王則也

按

中興書目有甘陵詠叛錄稱殿中丞王起撰起時為文彥博幕客然則別自一書也

涑水記聞十卷

司馬光撰此書行於世久矣其間記呂文靖數事呂氏子孫頗以為諱盖嘗辨之以為非溫公全書而公之曾孫侍郎伋季思遂從而實之上章乞毀板識者以為譏

書壬戌事一卷

不知何人作其記永樂之事甚詳

逸史二十卷

丞相陽羨蔣芾子禮撰其曾祖魏公之奇潁叔所記  
逸史殆數百冊兵火散失捃摭遺藁得六百六十事  
為十九門淳熙改元書成為之序

林氏野史八卷

同知樞密院長樂林希子中撰希不得志於元祐起  
從章惇甘心下遷西掖草諸賢謫詞者也而此書記

熙寧元豐以來事頗平直不類其所為或言此書作於元祐之前其後時事既變希亦隨之書藏不毀久而時事復變其孫懋於紹興中始序而行之耳

元和錄三卷

池州石埭縣尉維揚馬永錫明叟撰自元和三年牛李對策以至大中十三年令狐綯罷相唐朋黨本末具矣永錫嘗著唐職林實賓錄等書崇觀政和間人也又有馬永卿大年者從劉元城游大觀三年進士

當是其羣從館閣書目以永錫為唐人大誤也

邵氏辨誣三卷

右奉直大夫河南邵伯溫子文撰專辨紹聖羣小誣謗宣仁事本末紹興中其子待制溥上之

邵氏聞見錄二十卷

邵伯溫撰多記國朝事又有後錄三十卷其子溥所作不專紀事在子錄小說類

康節兩孫溥博嘗見川本邵氏聞見後錄名博今作

溥未知直齋何所據恐博是蓋刊本不應誤也

隨齋批注

### 國史後補五卷

蔡條撰條京之愛子京末年事皆出條條兄攸既叛父亦與條不咸此書大畧為其父自解而滔天之惡終有不能隱蓋者其間所載宮闈禁密非臣庶所得知亦非臣庶所宜言既出條筆事遂傳世殆非人力也

### 北征紀實二卷

蔡條撰叙伐燕本末歸罪童貫蔡攸亦欲為京文飾  
然京之罪不可掩也

靖康要錄五卷

不著撰人名氏自欽廟潛邸迄靖康元年十二月事

朝野僉言二卷

不著名氏有序建炎元年八月繫年錄稱夏少曾未

詳何人

靖康傳信錄一卷



丞相李綱伯紀撰丁未二月

靖康奉使錄一卷

鄭望之撰

靖康拾遺錄一卷

何烈撰又名草史

孤臣泣血錄三卷拾遺一卷

丁特起撰

裔夷謀夏錄七卷

翰林學士新安汪藻彥章撰

陷燕記一卷

賈子莊撰記燕山初陷事子莊不知其名蔡靖客也

南歸錄一卷

直秘閣沈瑄撰亦記燕山事

靖康錄一卷

太學生朱邦基撰

金人犯闕記一卷

草茅方冠撰

汴都記一卷

無名氏

靖康遺錄一卷

太學生沈良撰

靖康野錄一卷

無名氏

避戎夜話一卷

吳興石茂良太初撰

靖康小史一卷

不著名氏其末稱名曰烈即何烈草史也

痛定錄一卷

不著名氏

悲喜記一卷

圍城中人作書與所親曰中美知府者具述喪亂本末自稱名曰暘皆不知何人也

嘗見一書名皇旋陷虜記中間載秘書少監趙暘與姚太守書云云雖無中美之稱恐即此書也

隨齋批注

建炎中興記一卷

耿延禧撰

建炎中興日曆五卷

宰相新安汪伯彥廷俊撰叙元帥開府至南都踐極  
呂忠穆答客問一卷

宰相濟南呂頤浩元直撰

呂忠穆勤王記一卷

左宣教郎臧梓撰記建炎復辟事

渡江遭變錄一卷

丞相上蔡朱勝非藏一撰記苗劉作難至復辟事

建炎復辟記一卷

無名氏

建炎通問錄一卷

宣教郎傅雱撰建炎初李丞相綱所進

北狩聞見錄一卷

幹當龍德宮曹勛功顯撰勛扈從北狩以徽廟御札間道走行在所以建炎二年七月至南京

北狩行錄一卷

蔡絛王若沖撰

戊申維揚錄一卷

無名氏

維揚過江錄一卷

尚書左丞葉夢得少蘊撰

已酉航海記一卷

中書舍人李正民撰又名建炎居邠記

建炎假道高麗錄一卷

楊應誠撰取道遼東奉使金虜不達而還

紹興講和錄二卷

無名氏

亂華編三十三卷



知盱眙軍東平劉荀子卿編其前有小序數語云方  
敬塘割幽燕遺契丹之日孰知為本朝造福之原哉  
逮王安石創新法為闢國之謀又孰知紹述者名禍  
之酷哉所集雜史傳記近三十種荀忠肅丞相諸孫  
也

元祐黨籍列傳譜述一百卷

龔頤正撰以諸臣本傳及誌狀家傳遺事之類集成  
之其事跡微晦史不可見者則采拾諸書為之補傳

凡三百九人其闕者四人而已淳熙中史院取其書以修四朝國史洪邁奏乞甄錄補和州文學後賜出身詳見編年類頤正給事中原之曾孫也

紹興正論二卷

序稱瀟湘野夫不著名氏錄文武官不附和議及忤秦檜得罪者

紹興正論小傳二十卷

宗正寺主簿鄞樓昉暘叔撰以正論中姓名做元祐

黨傳為之

三朝北盟會編二百五十卷

直秘閣清江徐夢莘商老撰輯諸書二百餘家分上  
中下上為政宣二十五卷中為靖康七十五卷下為  
炎興百五十卷

北盟集補五十卷

夢莘以前書詮載不盡者五家續編次於中下二帙  
以補其闕靖康炎興各為二十五卷

中興十三處戰功錄一卷

參政眉山李壁季章撰中興以來禦寇立功惟此十三處編為一書所謂司勳藏其貳者也開禧乙丑北事將作其書成

建炎以來朝野雜記甲乙集共四十卷

李心傳撰上自帝系帝德朝政國典下及見聞瑣碎皆錄之蓋南渡以後野史之最詳者

西陲泰定錄九十卷

李心傳撰記吳曦叛逆以及削平本末起嘉泰辛酉迄嘉定辛未為三十七卷其後蜀事益多又增修至辛巳之冬通為九十卷仍頗用太史公年表例併記國家大政令邊防大節目首尾二十年

典故類

貞觀政要十卷

唐吳兢撰前題衛尉少卿兼修國史按新舊書列傳兢未嘗為此官而書亦不記歲月但其首稱良相侍

中安陽公中書令河東公亦未詳為何人館閣書目  
云神龍中所進當攷

魏鄭公諫錄五卷

唐尚書吏部郎中琅邪王綝撰綝字方慶以字行相  
武后其為吏部當在高宗時館閣書目作王琳誤也  
所錄魏公進諫奏對之語又名魏文貞公故事

翰林盛事一卷

唐剡尉常山張著處晦撰紀儒臣盛事自武德中迄

于天寶首載張文成七登科者即著之祖也

衣冠盛事一卷

唐武功蘇特撰

李司空論事一卷

唐大中史官蔣偕錄司空者李絳深之元和宰相也  
太和辨謗畧三卷

唐宰相李德裕撰初憲宗命令狐楚等為元和辨謗  
畧十卷錄周秦漢魏迄隋忠賢罹讒謗事迹德裕等

刪其繁蕪益以唐事裁成三卷太和中上之集賢學士裴潯為之序元和書今不存耶鄆書目亦止有前五卷

秦傳玉璽譜一卷

題博陵崔逢修協律郎嚴士元重修河中少尹魏德

謨潤色

衆文獻通攷宋史藝文志俱作魏德謨原本作德譽誤今改正

國璽傳一卷傳國璽記一卷

傳無名氏所記止唐肅宗記稱嚴士元與前大同小



異

玉璽雜記一卷

徐景撰乾元元年七月記唐志有徐景玉璽正錄即此書也

楚寶傳一卷

杜確撰肅宗乾元二年楚州尼真如獻寶事

八寶記一卷

無名氏大觀二年

唐文宗朝備問一卷

不著名氏雜錄唐朝典故

通典二百卷

唐宰相京兆杜佑君卿撰採五經羣史歷代沿革廢  
置羣士論議迄於天寶凡為八門曰食貨選舉職官  
禮樂兵刑法州郡邊防貞元中表上之李翰為之序  
初劉秩為政典三十五篇佑以為未盡廣而成之

續通典二百卷

翰林學士承旨大名宋白太素等撰咸平三年奉詔  
四年九月書成起唐至德初迄周顯德末王欽若言  
杜佑通典上下數千載為二百卷而其中四十卷為  
開元禮今之所載二百餘年亦如前書卷數時論非  
其重複

國朝通典二百卷

不著名氏或言魏鶴山所為似方草創未成書也凡  
通典會要前志及館閣書目皆列之類書按通典載

古今制度沿革會要專述典故非類書也

唐會要一百卷

司空平章事晉陽王溥齊物撰初唐德宗時蘇冕撰四十卷武宗朝崔鉉續四十卷至是溥又采宣宗以降故事共成百卷建隆二年正月上之按唐志蘇冕會要四十卷續會要四十卷楊紹復等撰崔鉉監修而會要稱杭州刺史蘇弁與兄冕纂國朝故事為是書弁聚書至二萬卷次於集賢芸閣弁字元容武功

人武后宰相良嗣之從孫冕仕為京兆士曹并判度  
支以腐粟給邊坐貶冕亦廢

五代會要三十卷

王溥撰

六朝國朝會要三百卷

監修國史華陽王珪禹玉撰始仁宗命纂修自建隆  
至慶歷四年成八十五卷熙寧三年珪為學士承旨  
乞續修至熙寧十年總二十一類八百五十五門

案文

獻通攷作總一十一  
類八百五十八門

舊書亦略增損為三百卷

政和重修國朝會要百十卷

先是王禹玉監修自建隆至熙寧凡三百卷崇寧中  
重修僅成吉禮百十卷政和進呈餘四類編治垂成  
宣和庚子罷局遂成散漫紹興間少蓬程俱申請就  
知桂州許中家借抄之許中嘗與崇寧修書故存此  
本得以備中禁之採錄今重修本題淮康軍節度使  
充禮制局詳議官蔡攸等奉勅重修

續會要三百卷

監修仙井虞允文并甫等上有紹興十年編修起元豐元年迄靖康之末乾道六年書成

中興會要二百卷

監修晉江梁克家叔子等上乾道六年既進續會要有旨自建炎元年續修止紹興三十二年九月成書  
國朝會要總類五百八十八卷

李心傳所編合三書為一刻於蜀中其板今在國子

監

三朝寶訓三十卷

翰林學士李淑等撰天聖五年監修國史青社王曾  
孝先奏乞用唐吳兢貞觀政要故事取三朝聖語政  
事及臣僚奏對不入正史者別為一書與國史實錄  
並行至十年書成詔以寶訓為名其後進讀於邇英  
延義今館閣書目以為二十卷富弼所上者非也乃  
政要爾



三朝訓鑑圖十卷

學士李淑楊偉等修纂慶歷八年偉初奉旨檢討三朝事迹乞與淑共編且乞制序皇祐元年書成項在莆田有售此書者亟求觀之則已為好事者所得蓋當時御府刻本也卷為一冊凡十事事為一圖飾以青赤亟命工傳錄凡字大小行廣狹設色規模一切從其舊斂衽鋪觀如生慶歷皇祐間目覩聖作明述之盛也按館閣書目載此書云繪采皆闕至續書目

乃云得其全未知果當時刻本乎抑亦摹傳也

三朝政要二十卷

宰相河南富弼彥國撰慶歷三年弼為樞副上言選  
官置局以三朝典故分門類聚編成一書以為模範  
命王洙余靖孫甫歐陽修同共編纂四年書成名太  
平故事凡九十六門每事之後各釋其意至紹興八  
年右朝議大夫呂源得舊印本刊正增廣名政要釋  
明策備上之於朝館閣書目指政要為寶訓非也

兩朝寶訓二十卷

禮部郎中長樂林希子中編進用天聖故事也元豐六年表上

仁皇訓典六卷

翰林侍講范祖禹撰元祐八年經筵所上凡三百十七條大畧亦用寶訓體

歷代年號并宮殿等名一卷

丞相饒陽李昉明叔在翰苑時所纂

朝制要覽五十卷

屯田郎中宋咸撰此書傳於陸放翁氏放翁書其後  
曰先君會稽公晚歲喜觀間為子弟講論因革率至  
夜分會稽公者其父宰元鈞也其書作於嘉祐中皆  
國初故實觀之使人有感焉

景德會計錄六卷

丞相吳郡丁謂謂之撰時為三司使序言歲收兩京  
十七路帳籍四萬四百有七日入疾徐事一千五百

文移倍之倣李吉甫國計簿賈耽國要圖總其目得四十列為六卷一戶賦二郡縣三課入四歲用五祿食六雜記大抵取景德中一年為準

皇祐會計錄六卷

樞密信都田況元均權三司使時所撰倣景德之舊取一歲最中者為準又為儲運一篇以補其闕

春明退朝錄三卷

龍圖閣直學士常山宋敏求次道撰所記多故實其

父宣獻公綬居第在春明坊如晁氏稱昭德也

先朝政範一卷

直集賢院徂徠石介守道編進自任將至悔過凡十  
二篇

尊號錄一卷

丞相安陸宋庠公序撰大意以為徽號夸詡非古而  
我祖宗往往謙遜不居猶願超然遠覽盡屏前號其  
愛君以德者歟至神宗遂卻不受至於今行之

輔弼名對四十卷

天禧中前進士劉顏編自漢迄五代為四十門

青社賑濟錄一卷

丞相富文忠公弼青州揀荒施行文牘也

元豐問事錄二卷

光祿寺丞李德芻撰德芻邯鄲李淑之子元豐中為  
詳定官制檢討文字詔旨所問奏藁錄為此書

官制局紀事一卷

李德芻奉旨編錄置局以來命官等事

中書備對十卷

太常丞檢正戶房公事管城畢仲衍夷仲撰凡一百二十五門附五十八事

呂申公掌記一卷

丞相申國呂公著晦叔撰在相位所記人材已用未用名姓及事當行已行條目

元祐榮觀集五卷



左朝奉大夫權太學正汪浹撰記元祐六年視學本  
末并羣臣所上詩賦頌表之類張舜民芸叟為之序  
泰陵故事二十卷

不著名氏皆叙宣仁臨朝九年中制誥表章奏議之  
屬

四明尊堯集一卷

司諫延平陳瓘瑩中撰專辨王安石日錄之誣僭不  
孫與配食坐像之為不恭瓘初在諫省未以安石為

非合浦所著尊堯集猶回隱不直末乃悔之復為此書以謂蔡卞專用日錄以修神宗實錄薄神考而厚安石尊私史而壓宗廟以是編類其語得六十五條總而論之坐此羈管台州

尊堯錄八卷

延平羅從彥仲素撰從彥師事楊時而李侗又師從彥所謂南劍三先生者也從彥當靖康初以為本朝之禍起於熙豐不遵祖宗故事故採四朝事為此錄

及李沆寇準王旦王曾杜衍韓琦范仲淹富弼司馬  
光程顥名輔巨儒十人言行附於其後未有別錄一  
卷專載司馬光論王安石陳瓘論蔡京奏疏欲上之  
朝不果嘉定中太守劉允濟得其書奏之且為版行  
本朝事實三十卷

右承議郎李攸撰

案文獻通考攸  
攸作李攸

雜錄故事不成條貫統

紀

皇朝治迹統類七十三卷

眉山彭百川叔融撰略用素樞通鑑本末條例為前集四十卷中興後事為後集三十三卷

皇朝事類樞要二百五十卷

蜀人張和卿編集為一百五十門蓋舉子答策之具也

東家雜記二卷

右朝議大夫孔傳撰歷代追崇先聖故事及孔林古跡傳蓋先聖四十七世孫也

長樂財賦志十六卷

知漳州長樂何萬一之撰往在鄭學訪同官薛師雍  
子然凡案間有書一編大畧述三山一郡財計而累  
朝詔令申明沿革甚詳其書雖為一郡設於天下實  
相通問所從得薛曰外舅陳止齋修圖經欲以為財  
賦一門後緣卷帙多不果入因借錄之書無標目以  
意命之曰三山財計本末及來莆田為鄭庸子敬道  
之鄭曰家有何一之長樂財賦志豈此耶復借觀之

良是其間亦微有增損末又有安撫司一卷併鈔錄  
附益為全書

內治聖監二十卷

起居舍人兼嘉王府贊讀清江彭龜年子壽撰取列  
聖修身齊家教子訓齊宗室防制外戚宦官督御等  
事以紹熙五年表上之光宗稱善且曰祖宗家法最  
善漢唐所不及也

高宗聖政草一卷

陸游在隆興初奉詔修高宗聖政草創凡例多出其  
手未成而去私篋不敢留藁他日追記得此錄之而  
書其後凡二十條

高宗孝宗聖政編要二十卷

高宗聖政五十卷孝宗聖政五十卷乾道淳熙中所  
修皆有御製序此二帙書坊鈔節以便舉子應用之  
儲也

孝宗聖政十二卷

亦書坊鈔節比前為稍詳

會稽和買事宜錄七卷

浙東帥鄱陽洪邁景廬提舉常平三山鄭湜補之集  
初承平時預買令下守越者無遠慮凡一路州縣所  
不受之數悉受之故越之額特重以匹計者十四萬  
六千九百居浙東之半人戶百計規免皆詭為第五  
等戶而四等以上戶之害日益甚於是有為畝頭均  
科之說者帥鄭丙少嘉憲邱崇宗卿張詔君卿頗主



之由淳熙十一年以後略施行而議者多以勅科五等戶為不便參政李彥穎秀叔尚書王希呂仲行先後帥越皆言之而王畫八事尤力會光廟亦以為貽貧弱之害戶部尚書葉翥叔羽奏乞先減四萬四千餘匹止以十萬為額而後議均敷詔從之仍令侍從集議皆乞闕併詭挾

案文獻通攷闕字作闕誤

遂詔邁湜措置既

畢以施行次第類成此書時紹熙元年也

劉忠肅救荒錄五卷

王居仁撰淳熙乙未樞密劉珙共父帥江東救荒本  
末嘉定乙亥真景元刻之漕司以配富鄭公青社之  
編而以劉公行狀謚議附錄於後

西漢會要七十卷東漢會要四十卷

武學博士清江徐天麟仲祥撰以二史所載漢家制  
度典章散於紀傳表志者倣唐以來會要體分門編  
纂其用力勤矣其言范蔚宗志藁為謝儼蠟以覆車  
劉昭因蔚宗遺緒注而補之夫既曰蠟以覆車安得

復有遺緒蓋未攷昭之所著實司馬紹統續漢書志也仲祥乙丑進士世有史學其世父夢莘商老著北盟會編

案著北盟會編者乃徐夢莘原本作夢莘誤今改正

父得之思叔為左

氏國紀兄筠孟堅作漢官考皆行於世

漢制叢錄三十二卷

案宋史藝文志作二十卷文獻通攷作三十三卷

袁夢麟應祥撰以二漢所記典故分門編類凡二十

五門

平陽會四卷

通直郎知平陽縣汪季良子駟撰平陽號難治為潞東三陽之冠季良治有聲廼以一邑財計自兩稅而下為二十一篇終於歲會旁通沿革本末大畧備矣又為外篇五條如砧基副本催科檢放及書手除科敷之類以為此財用所從出也季良端明應辰之孫佳士且能吏也得年不永士論惜之

唐昌計二卷


案計字文獻  
通攷作記

知昌化縣趙希奎克家撰





直齋書錄解題卷五



總校官庶吉士

臣

侍

朝

校對官庶吉士

臣

何思鈞

膳錄監生

臣

劉震

欽定四庫全書薈要

史部

直齋書錄解題卷

六

詳校官員外郎臣潘紹觀





欽定四庫全書薈要卷九千七百十二

史部

直齋書錄解題卷六

宋 陳振孫 撰

職官類

漢官儀一卷續補一卷

後漢軍謀校尉汝南應劭仲遠撰按唐志有漢官五

卷漢官儀十卷今惟存此一卷載三公官名及名姓

州里而已其全書亡矣李埴季允嘗續補一卷

漢官典儀一卷續補一卷

漢衛尉蔡質撰雜記官制及上書謁見禮式隋志有  
漢官典職儀式二卷今存一卷李埴亦補一卷其續  
者皆出於史中採拾

漢官舊儀三卷

案隋書經籍志唐書  
藝文志俱作四卷

漢議郎東海衛宏敬仲撰或云胡廣按宏本傳作漢  
舊儀四篇以載西京雜事不名漢官今此惟三卷而  
又有漢官之目未知果當時本書否唐志亦無官字  
舊在儀注類以其載官制為多故著於此

案陳氏因  
是書有漢

官之名疑非衛宏作又疑以為胡廣作考漢書注中頗有稱胡廣曰者與漢舊儀互引其文亦絕不相合惟廣傳載廣詩賦銘頌及解詁二十二篇而史注所引別有漢書解詁之名蓋即廣所作而舊儀之出衛宏手當無疑也其稱漢官舊儀者或後人因其所載官制而妄加之耳

## 唐六典三十卷

題御撰李林甫等奉勅注按韋述集賢記注開元十年起居舍人陸堅被旨修六典上手寫白麻紙凡六條曰理教禮政刑事典令以類相從撰錄以進張說以其事委徐堅思之歷年未知所適又委毋煥余欽

韋述始以令式入六司象周禮六官之制其沿革並入注然用功艱難其後張九齡又以委苑咸二十六

年奏草上至今在書院亦不行

衆唐書藝文志張說以其事委徐堅經歲

無規制乃命毋貳余欽咸虞業孫李良韋述參撰又蕭嵩知院加劉鄭蘭蕭晟盧若虛張九齡知院加陸善經李林甫代九齡加苑咸委苑咸者乃李林甫也至云二十六年奏草上考新舊唐書九齡以二十四年罷知政事尋謫荊州程大昌謂書成於九齡為相之日當在二十四年林甫注成奏進當在二十七年故是書卷首止列李林甫而不及九齡也今案新書百官志皆取此書即

太宗貞觀六年所定官令也周官六職視周禮六典

已有邦土邦事之殊不可攷證唐志內外官與周制  
迥然不同而強名六典可乎善乎范太史祖禹之言  
曰既有太尉司徒司空而又有尚書省是政出於二  
也既有尚書省而又有九寺是政出於三也本朝裕  
陵好觀六典元豐官制盡用之中書造命門下審覆  
尚書奉行機事往往留滯上意頗以為悔云

元和百司舉要二卷

唐宰相趙郡李吉甫宏憲撰首稱文班八十四司四

百六十員武班二十六司一百八十員都計六百四十員未稱在京文武官及府縣總三千七百九十九員意者當時實數也

具員故事十卷

唐鳳閣舍人梁載言撰以唐官具員附之歷代事迹蓋後人職林職官分紀之類所從始也或稱職總聯珠崇文總目又作具員事迹中興書目惟有七卷三

卷闕

梁唐書藝文志梁載言具員故事十卷又具員事迹十卷乃二書也

官品纂要十卷

唐樂安任戩撰以官品令為主而階職勳爵隨品具列歷代沿革頗著其要戩舉進士不第為此書當太和丁未

御史臺記十二卷

唐殿中侍御史南陽韓琬茂貞撰自唐初迄開元五年御史姓名行事及官制沿革皆詳著之第八卷為琬著傳九卷以後為右臺右臺創於武后廢於中宗

歲月蓋不久也未有雜說五十七條

御史臺故事三卷

唐朝集使洺州錄事參軍李結撰

結本名構避光堯御諱

隨齋  
批注

御史臺記五卷

不知何人作記本朝御史臺事至崇觀間

集賢注記三卷

唐集賢院學士京兆韋述撰叙置院始末學士名氏



及院中故事

史館故事錄三卷

不著名氏凡為六門曰叙事史例編修直筆曲筆而終之以雜錄末稱皇朝廣順則是周朝史官也

翰林志一卷

唐學士李肇撰

承旨學士院記一卷

唐承旨河南元稹微之撰專載承旨姓名自貞元二

十一年鄭綱至元和十五年杜元穎并稹為十二人  
末又有李德裕李紳韋處厚三人蓋後人所益也

翰林學士記一卷

唐侍講學士萬年韋處厚德載撰

翰林院故事一卷

唐學士京兆韋執誼撰

翰林學士院舊規一卷

唐學士馮翊楊鉅文碩撰雜記院中事例及文書格

式其祠祭祝版社稷宗廟上至天地用伏惟尚饗嶽  
瀆而降只曰尚饗此例今人皆莫之知則施之尊卑  
無別矣鉅宰相收之子其為學士在昭宗時

重修翰林壁記一卷

唐學士丁居晦撰開元二年也所記姓名迄於咸通  
而獨無天寶大歷學士為不可曉

金坡遺事三卷

學士吳越錢惟演希聖撰題名自建隆至天聖四年

凡四十七人自開元而下合三百一十五人其他典故視前記詳矣

別書金坡遺事一卷

學士澶淵晁迥昭遠撰因錢惟演寄示遺事別書真

宗待遇恩禮三則於後

案別書以下原本闕今據文獻通攷補入

翰苑雜記一卷

學士饒陽李宗諤昌武撰

續翰林志一卷次續志一卷

學士承旨梓潼蘇易簡太簡撰以續唐李肇之書其  
子耆又以其父遭遇恩禮之盛續於其後

翰苑羣書三卷

學士承旨鄱陽洪遵景嚴撰自李肇而下十一家及  
年表中興後題名共為一書而以其所錄遺事附其  
末總為三卷遵後至簽樞父皓兄适弟邁四人入翰  
苑可謂盛矣

翰林遺事一卷

洪遵撰已見上錄諸書所未及者

掖垣叢志三卷

丞相安陸宋庠公序撰時為正字

職林二十卷

集賢院學士錢唐楊侃撰咸平二年所序有胡昉者  
明道二年作後序增益事實七百四十五條而以新  
續標之侃端拱進士晚為知制誥避真宗舊諱更名  
大雅歐陽公其婿也集中有墓誌

職官分紀五十卷

富春孫逢吉彥同撰大抵本職林而增廣之其條例精密事實詳備矣秦少游序之元祐七年也

官制學制各一卷

司馬光撰

唐職林三十卷

石埭尉維揚馬永錫明叟撰以唐六典為主而附以新史所載事實頗采傳記歌詩之屬政和乙未天台

左譽序

朝集院須知一卷

無名氏錄承平時京朝官得替回朝見禮式

皇宗館閣錄五卷

不著名氏所記止於元祐中興館閣書目云秘閣校理宋匪躬撰又云共八門元十五卷存十一卷今本止五卷不見門類前三卷又混而為一意未必全書也



蓬山志五卷

秘書少監劍川羅畸疇老撰凡十五門崇寧四年序  
麟臺故事五卷

中書舍人信安程俱致道撰中興之初復置館職俱  
為少蓬采摭舊聞參攷裁定條上既畧施行而為書  
十有二篇以進俱在承平時凡三入省故其見聞為  
詳

中興館閣錄十卷續十卷

秘書監天台陳騭叔進撰淳熙中騭長蓬山與同僚  
錄建炎以來事為此書李燾仁父為之序續錄者後  
人因舊文增附之

案續錄乃嘉定三年館閣重行編次後人次第補錄迄於咸淳者

續史館故事一卷

著作佐郎曲阿洪興祖慶善撰記國朝史館事迹以  
續舊編

祖宗官制舊典三卷

直龍圖閣東萊蔡惇元道撰

案元道原本作元通今據宋史藝文志校改

大畧以為元豐用官階寄祿雖號正名而流品混淆  
爵位輕濫故以祖宗舊典與新制參稽並攷而論其  
得失元道文忠公參政齊之姪孫而翰林學士延慶  
之子渡江卒於涪陵尹和靖煇嘗題其墓

官制舊典正誤一卷

無名氏

國朝官制沿革一卷

黃琮元禮撰

職官記一卷

大理少卿張綰季長撰專載新舊遷轉之異亦以寄  
祿為未然也以上三家皆附蔡氏書後綰蜀人陸務  
觀與之厚善

官制新典十卷

熊克撰其書以元豐新制為主而元祐之畧加通變  
崇政之恣為紛更皆具列焉

聖朝職略二十卷

熊克撰做馬永錫唐職林攷其廢置因革亦頗采故事摘舊制詰中語附焉其書猶草創未成蓋應用之具也

宰輔拜罷錄二十四卷

史館修撰范沖元長等撰起建隆元年止紹興六年宰相自范質至張浚執政自趙普至折彥質各記除授年月訓詞亦略叙在位本末於後

國朝相輔年表一卷續一卷

同知太常禮院開封陳繹和叔撰自建隆庚申迄治平丙午續自丁未迄紹興十四年稱臣易記而不著姓當是李易也時方自給事中奉祠其曰私題臣繹之次者其書盖未必上而私續之云爾自後接於嘉定則後人所益也

職源五十卷

大理司直金華王益之行甫撰亦簡牘應用之書而專以今日見行官制為主盖中興以後於舊制多所

併省故也

元輔表一卷

龔頤正撰專錄宰相不及執政

漢官攷六卷

知金州清江徐筠孟堅撰以百官表官制為主而紀傳及注家所載皆輯而錄之

漢官總錄十卷

王益之撰大較亦如前書

縣法一卷

北京留守溫陵呂惠卿吉甫撰曰法令詞訟刑獄簿  
歷催科給納災傷盜賊勸課教化凡十門為縣之法  
備於此矣雖今古事殊而大體不能越也惠卿小人  
之雄於材術固優然法令居首而教化乃居其末不  
曰俗吏而謂之何哉

縣務綱目二十卷

贛陽劉鵬撰凡四十四門四百七十餘事其說不止



於作縣而事關係縣務者為多焉元符庚辰叙  
作邑自箴十卷

李元弼持國撰政和丁酉序

中興百官題名五十卷

監察御史臨川何異同叔撰首卷為宰輔拜罷錄餘  
以次列之刻板浙漕其後以時增附渡江之初庶務  
草創諸司間有不可攷者多闕之

齊齋臺諫論二卷

尚書雲川倪思正父撰嘉定初更化矯韓氏用事之弊於是為論三篇言為之鷹犬者罪在臺諫已而其弊自若也則又為續論六篇言其情狀益精詳凡為臺諫之所以得所以失者至矣盡矣

禮注類

獨斷二卷

漢議郎陳留蔡邕伯喈撰記漢世制度禮文車服及諸帝世次而兼及前代禮樂舒台二郡皆有刻本向

在莆田嘗錄李氏本大略與二本同而上下卷前後錯互因並存之

開元禮一百五十卷

唐集賢院學士蕭嵩王仲邱等撰唐初有貞觀顯慶禮儀注不同而顯慶又出於許敬宗希旨傳會不足施用開元十四年通事舍人王彛請刪禮記舊文而益以今事張說以為禮記不可改易宜折衷貞觀顯慶以為唐禮乃詔徐堅李銳施敬本撰述蕭嵩王仲

邱繼之書成唐之五禮之文始備於是遂以設科取士新史禮樂志大略采摭著于篇然唐初已降凶禮於五禮之末至顯慶遂削去國恤一篇則敬宗諂諛諱惡鄙陋亡稽卒不能正也

案唐書藝文志開元禮乃賈登張烜施敬本李

銳王仲邱陸善經洪孝昌撰輯蕭嵩總之不著徐堅姓氏

# 開元禮百問二卷

不著名氏

案唐志亦稱蕭嵩撰

以古今異制設為問答凡百條

# 大唐郊祀錄十卷

唐太常禮院修撰王涇撰考次歷代郊廟沿革之制  
及其工歌祝號而圖其壇屋陟降之序貞元中上之  
禮閣新儀三十卷

唐太常修撰京兆韋公肅撰錄開元以後禮文損益  
至元和十年其一卷為目錄按館閣書目云卷數雖  
存而書不全又復差互重出今本不爾但目錄稍誤  
續曲臺禮三十卷

唐太常博士太原王彥威撰

宋史藝文志注  
云一本作崔靈恩

元和

十三年嘗獻曲臺新禮三十卷至長慶中又自元和之末次第編錄下及公卿士庶昏姻喪祭之禮并目錄為三十卷通前為六十一卷案此惟續書而亦無目錄全書則未之見也館閣書目亦無之文宗朝彥威仕為尚書節度使

開元通禮二百卷

御史中丞洛陽劉溫叟永齡等撰開寶四年五月命溫叟及李昉盧多遜扈蒙楊昭儉賈黃中和峴陳諤

以開元禮重加損益以成此書

太常新禮四十卷

提舉編修賈昌朝子明等上景祐四年同知太常禮  
院浦城吳育春卿言本院所藏禮文故事未經刊修  
請擇官參定至慶歷四年始成凡通禮所存悉仍其  
舊裒其異者列之為一百二十篇編修官孫祖德李  
宥張方平呂公綽曾公亮王洙孫瑜余靖刁約

天聖鹵簿圖記十卷

翰林學士常山宋綬公垂撰始太祖朝鹵簿以繡易  
畫號繡衣鹵簿真宗時王欽若為記二卷闕於繪事  
弗可詳識綬與馮元孫奭受詔質正古義傳以新制  
車騎人物器服之品皆繪其首者名同飾異亦別出  
焉天聖六年十一月上之其攷訂援證詳洽可稽  
大饗明堂記二十卷紀要二卷

宰相河汾文彥博寬夫等撰國朝開創以來三歲親  
郊未嘗躬行大饗之禮皇祐二年二月詔以季秋擇



日有事於明堂而罷冬至郊祀直龍圖閣王洙言國  
家每歲大饗止於南郊寓祭不合典禮古者明堂宗  
廟路寢同制今大慶殿即路寢也九月親祀當於大  
慶殿行禮詔用其言禮成命彥博及次相宋庠參預  
高若訥編修為記

案宋史作高若訥原  
本作君納誤今改正

上親製序文

已而彥博以簡牘繁多別為紀要首載聖訓欲以大  
慶為明堂禮官之議適與聖意合云

元豐郊廟奉祀禮文三十卷

崇文院校書楊完撰初元豐元年詔以郊廟奉祀禮文訛舛就太常寺置局命陳襄李清臣王存黃履等詳定完及何洵直孫諤檢討其後本局乞令原檢討官楊完編類上進至五年四月書成奏御

閤門儀制十二卷

學士李淑等修定皆朝廷禮式也

政和五禮新儀二百四十卷目錄五卷

議禮局官知樞密院鄭居中尚書白時中慕容彥逢

學士強淵明等撰首卷祐陵御製序文次九卷御筆  
指揮次十卷御製冠禮餘二百二十卷局官所修也  
政和五禮撮要十五卷

紹興中有范其姓者為湖北漕取品官士庶冠昏喪  
祭為一編刻板學宮不著名以武昌志考之為漕者  
有范正國范寅秩不知其為誰也

政和冠昏喪祭禮十五卷

紹熙中南康黃灝商伯為禮官請於政和五禮內掇

取品官庶人禮摹印頒之郡縣從之其實即前十五卷書也

訓俗書一卷

許洞洞夫撰述廟祭冠笄之禮而拜掃附於末謝絳希深王舉正皆有序跋洞淳化三年進士希深之舅也

孟氏家祭禮一卷

唐侍御史平昌孟銑撰曰正祭節祠薦新義例凡四

篇

徐氏家祭禮一卷

唐左金吾衛倉曹參軍徐潤撰

鄭氏祠享禮一卷

唐侍御史鄭正則撰

范氏寢堂時饗禮一卷

唐涇縣尉南陽范傳式殿中侍御史傳正修定

賈氏家祭禮一卷

唐武功縣尉賈頊撰

新定寢祀禮一卷

不知作者中興館閣書目有此書云前後有序題太常博士陳致雍撰集今此本亦前後有序意其是也致雍晉江人及仕本朝

孫氏仲享儀一卷

案文獻通攷作祭享禮

檢校左散騎常侍孫日用撰周顯德中博士後仕本朝開寶時作此書

杜氏四時祭享禮一卷

丞相山陰杜衍世昌撰

韓氏古今家祭式一卷

司徒兼侍中相臺韓琦稚圭撰

橫渠張氏祭禮一卷

張載子厚撰末有呂大鈞和叔說數條附焉

伊川程氏祭禮一卷

程頤正叔撰首載作主式

呂氏家祭禮一卷

丞相京兆呂大防微仲正字大臨與叔撰

范氏家祭禮一卷

范祖禹淳甫撰

溫公書儀一卷

司馬光撰前一卷為表章書啓式餘則冠昏喪祭之禮詳焉

居家雜禮一卷



司馬光撰

呂氏鄉約一卷鄉儀一卷

呂大鈞和叔撰

高氏送終禮一卷

禮部侍郎高閌抑崇撰

四家禮範五卷

張栻朱熹所集司馬程張呂氏諸家而建安劉珙刻

於金陵

古今家祭禮二十卷

朱熹集通典會要所載以及唐本朝諸家祭禮皆在焉

朱氏家禮一卷

朱熹撰

十書類編三卷

不知何人所集十書者管子弟子職曹昭女誡韓氏家祭式司馬溫公居家雜禮呂氏鄉禮范氏義莊規

高氏送終禮高登修學門庭朱氏重定鄉約社倉約束也雖不專為禮而禮居多故附之於此

廟儀一卷

吏部侍郎趙粹中撰進專為太祖未正東鄉之位乃

裒董弁王普趙渙首議

案文獻通攷作趙漢

與一時討論本末

上之時淳熙中也

奉常雜錄一卷樂章一卷

無名氏雜錄禮寺牲牢樂舞祝辭其樂章則祠祭見

行用者

服飾變古元錄三卷

唐翰林學士汝南袁郊之儀撰郊宰相滋之子唐志  
作一卷

古今服飾儀一卷

題蜀人樊建紹興癸酉序

時令類

前史時令之書皆入子部農家類今案諸書上

自國家典禮下及里閭風俗悉載之不專農事也故中興館閣書目別為一類列之史部是矣今從之

夏小正傳四卷

漢戴德傳給事中山陰傅崧卿注此書本在大戴禮鄭康成注禮運夏時曰夏四時之書也其存者有小正後人於大戴禮鈔出別行崧卿以正文與傳相雜倣左氏經傳列正文其前而附以傳且為之注

荆楚歲時記六卷

案唐宋藝文志俱作一卷

梁吏部尚書宗懷撰記荆楚風物故事

錦帶一卷

梁元帝撰比事儷語若法帖中章草月儀之類也

案今

本作錦帶書題梁

昭明太子蕭統撰

玉燭寶典十二卷

隋著作郎博陵杜臺卿少山撰以月令為主觸類而廣之博采諸書旁及時俗月為一卷頗號詳洽開皇

中所上

金谷園記一卷

題李邕撰館閣書目云唐中散大夫按邕字泰和江都人至北海太守世號李北海其父善注文選者也中散大夫唐文散階本傳不載不知書目別何所據唐世不應有兩李邕也

秦中歲時記一卷

唐膳部郎中趙郡李綽撰綽別未見此據中興書目

云爾其序曰緬思庚子之歲洊周戊辰之年庚子唐  
廣明元年戊辰梁開平二年也又曰偶記昔年皇居  
舊事絕筆自歎橫襟出涕然則唐之舊臣國亡之後  
傷感疇昔而為此書也按朱藏一紺珠集曾端伯類  
說載此書有杏園探花使端午扇市歲除儺公儺母  
及太和八年無名子詩數事今皆無之豈別一書乎  
咸鎬故事一卷

唐韋慎微撰其書與前大同小異竟不知何人作也



卷末却有鬼神大者號儼公母一語案館閣書目秦  
中歲時記一名咸鎬歲時記

千金月令三卷

唐孫思邈撰

韋氏月錄一卷

唐右領軍衛兵曹韋行規撰李翱為之序

歲華紀麗七卷

案唐書藝文志作二卷  
宋史藝文志作四卷

唐韓鄂撰采經子史傳歲時事類聚而以儷語間之

國朝時令集解十二卷

左僕射真定賈昌朝子明撰唐因禮記月令舊文增損為禮記首篇天寶中改名時令景祐初始命復禮記舊文其唐之時令別為一篇遂命禮院修書官丁度李淑宋祁王洙鄭戩及昌朝約唐時令撰定為國朝時令以便宣讀蓋自唐以來有明堂讀時令之禮也及昌朝解相印治郡五臣者皆已淪沒乃采經史諸書及祖宗詔令典式為之集解而上之

歲時雜記二卷

侍講東萊呂希哲原明撰希哲正獻公公著之子號  
滎陽公在歷陽時與子孫講誦遇節日則休學者雜  
記風俗之舊然後團坐飲酒以為樂久而成編永平  
舊事猶有攷焉

直齋書錄解題卷六